

Crimen y delitonan y asesinato di Louisa Braaf

Den anotacionnan cu **Juby Naar** tin documenta di bida na Aruba di 1850 pa 1921, tin tambe cantidad di casonan cu awe lo por ser considera como "noticia di polis". Aki ta sigui algun di e casonan.

Dia 14 di januari 1886 gezaghebber a pone Gouverneur na altura di peticion di **Sra. Anna Geerman** pidiendo "gratie" pa su casa **Antonio Geerman**, relaciona cu e sentencia dicta dia 29 di december contra Antonio pa "poging tot diefstal". (intento pa comete ladronicia)

MALTRATO CU ARMA

Jan Semeleer dia 29 di september 1886 a dal **Tony Indian** cu chapi den cabez, causando un herida hopi peligroso.

E caso a ser poni den man di Ambtenaar di Openbare ministerie.

Tabata di dos caso di violencia den un luna usando herment di trabao como arma.

A ser documenta cu Polis no ta muestra su autoridad, locual ta demoraliza clase abao di poblacion cu ta desea mas energia di ambtenaar di Openbare Ministerie.

Dia 18 di mei 1887, mas o menos 9 or anochi, **E.L. Zepfenfeldt**, segun su declaracion, a ser hinca pa un persona cu un obheto skerpi, den barica.

Esaki na momento cu e tabata cera porta dilanti di su cas.

E agresor a core bay mes ora. **Zeppenfeldt** a bisa di a bula na banda na ora, di manera cu e obheto no a drenta su barica y a causa solamente un herida leve.

Asina cu polis a haya e notificacion, un ambtenaar di Openbare ministerie a cay cas di **Zeppenfeldt** pa investiga. E sospecho ta cu e agresor tabata **Natalio Capriles**.

A bay interroga Natalio pero e investigacion no a conduci na su detencion.

Tres dia despues di e caso, despues di mas investigacion, ambtenaar di Openbare ministerie a laga detene y cera **Natalio Capriles** como sospechoso di asalto riba **Zeppenfeldt**.

Dia 25 di juni 1887, cu Gezaghebber Geartse a bolbe di Corsow, a bin cune rechtercommissaris na Hof van Justitie na Corsow, **M.R. M. Ribbins** y griffier **R. Faarup**, pa interroga **Natalio Capriles** den e caso di intento

di asesinato.

Te dia 6 di juli nan a bolbe Corsow.

Dia 1 di juni 1887 den oranan di anochi, **Bicento Tromp** a ser ataca riba caminda publico pa **Francisco Tromp** y herida cu cuchu.

Mes ora polis a keda notifica y a cuminsa busca **Francisco**. E dia siguiente a detene **Francisco Tromp** y **Antoin Maduro** como complice y tur dos a keda den detencion preventivo.

ASESINATO

Riba e anochi di **9 pa 10 di januari 1888**, un crimen cruel a tuma lugar.

Dos homber a drenta cas di **Louisa Braaf** via bentana.

E cas ta na Noord-rand di Playa y **Louisa** tabata biba su sq.

E agresornan a baha e muher di cama y lastre te den sala. Aki nan a hinke cu cuchu na garganta y bay lague pa morto den plas di sanger.

E no a muri.

Mainta el a recobra forza y a lastra bin afo, busca bisiñanan pa auxilio.

Ambtenaar di Ministerio Publico a bay cu polis y docter di gobierno, pa investiga. Nan no a haya ningun indicacion di e presunto autornan di e crimen.

Pa medio di señal e victima por a duna informacion.

Su corocoro tabata corta y e no por a papia.

Debi na scuridat e no por a reconoce a criminalnan.

Docter a bisa di no ta kere cu e lo por biba mucho mas y **dia 14 di januari Louisa Braaf a muri** debi na heridan.

Dos siman despues di e caso, **dia 27 di januari**, huez comisario di Hof van Justitie Curacao **Mr. R.M. Ribbins** y griffier **P. Faarup** a yega Aruba cu barco **Minerva** pa ricibi mas informacion riba e caso aki.

Dia 31 di januari 1888 gezaghebber a skirbi, cu huez comisario a traha hopi riba e caso di **Louisa Braaf**, desde cu el a yega Aruba.

Ta sospecha **Jan Semeleer** y **Antonio Tera**, tambe **Eustacio Leon** y su ruman **Antonio Leon** di a comete e crimen.

A resulta cu algun dia prome cu huez comisario a yega Aruba, **Jan Semeleer** a baha pa Venezuela, pero e 3 otro nan si a keda deteni.

Ta un di nan so a bay Corsow

dia 12 di februari 1888 hunto cu huez comisario **R.M. Ribbins** y griffier **Faarup**, y esey tabata **Eustacio Leon**.

AMENAZA Y MORTO

Dia 21 di februari 1888 ambtenaar di ministerio publico a pone gezaghebber na altura di denuncia di **Delphi**

Curiel contra su casa cu a menase cu morto y cu a viola su yiu di crianza.

Dia 21 di juni 1888 a haya e districtmeester di 4de district, **Henry Croes** morto. El a pasa anochi na cas di su swa y segun docter di gobierno, el a bebe di mas y haya atake di corazon.

Dia 30 di juni a informa gobernador di morto di

Henry Croes, y pa nombra **Frans Rasmijn** como districtmeester.

Dia 15 di mei 1889 beschikking a wordo traha pa retira veldwachter **Jose Kemp** debi na buracheria continuo, y a popone pa nombra **Adriaan Luciano Tromp** na su lugar. **Adriaan Luciano Tromp** a huramenta dia 16 di mei 1889.

Algun curiosidad di pasado na Aruba

E BOTTER DI E PRINS

Den su anotacionnan den su documentacionnan di Aruba di **1850 pa 1921 dia pa dia**, **Juby Naar** tin anota un cantidad di curiosidadnan di cual aki ta saca algun pa e publicacion aki.

E tin skirbi cu **dia 14 di maart 1888** director di **Aruba Phosphaat**, na Cero Colorado, **J.P. Evertsz** a manda pa Gezaghebber, un botter cu a haya riba beach na Cero Colorado.

Den e botter tabata tin un nota cu a menciona, cu e botter a ser tira na awa, di parti di **Su Alteza Real Prins di Monaco**, for di e yate **L'Hirondelle**, cu peticion pa esun cu haya esaki, entrega e botter cu e nota, na autoridadnan maritimo di cualquier pais cu ta, pa esaki wordo manda pa gobierno frances.

Gobernador a wordo poni na altura y e botter cu e nota a bay Corsow pa di eynan e wordo manda Francia. No tin menciona ningun caminda kico a pasa despues cu e botter.

CELEBRACION GRANDI

Dia 1 di juli 1888 den misa Reforma y misa Catolico, a tene servicio special, relaciona cu abolicion di sclavitud 25 aña pasa (1863).

Despues di misa, muchanan di school catolico a bay edificio di goberna-

cion unda nan a canta himno hulandes y otro cancionnan cu ta pas cu e actividad.

Un publico grandi a presenta cu bandera y musica den parada.

Despues di discurso di gezaghebber, a treat tur hende.

Muchanan a haya treat na school riba cuenta di gobierno.

Anochi tabata tin fiesta bailable diferente caminda, sin irregularidad.

PLACA DI OBRERONAN

Dia 7 di februari 1889 durante e periodo sin docter na Aruba, y cu obreronan a cuminsa biaha pa busca trabao na Valencia, y cu tabata tin e segura, gezaghebber a skirbi, cu e situacion economico a drecha na Aruba debi na e placa cu obreronan tabata manda for di Valencia y cu ta ser controla segun medida di gobernador. Pa luna continuamente tabata tin 2000 florin den circulacion di mitar di e salario di e obreronan.

E placa tabata ser entrega na familiaran di e obreronan.

ILEGAL A YEGA ARUBA

E prome anotacion di un persona cu a yega Aruba ilegal, tabata dia 28 di September 1889.

Tabata trata di un italiano **Stefano Berti**, alias **Carlo Bartolome**, alias **Carlos Bartololi**, sin trabao ni lugar di biba na Aruba.

El a wordo bisa pa bandona Aruba cu e mes barco cu a trece for di Corsow.

MORTONAN

Dia 25 di september 1886 a pone Gouverneur na altura cu **Jacobus Jaarman** a muri na Aruba.

Dia 15 di december 1888 gezahebber a lesa den Cuacaosche Courant, cu gezaghebber **Michael de Veer** a muri na Hulanda, y a pidi tur doño di barco den waf pa hisa bandera halfstok.

Sjiem Fat & Carlo

Law Offices, Advocatenkantoor

Bij beschikking d.d. 24 april 2003 van het Gerecht in Eerste Aanleg van Aruba is de naamloze vennootschap **SUPERMERCADO FAVORITO N.V.** in staat van faillissement verklaard met benoeming van Mevrouw mr. P. de Bruin als Rechter Commissaris en de advocaat en de advocaat Mevrouw mr. Doris M. Leitch-Canwood tot curatrice. Een schuldeisersvergadering zal plaatsvinden op een nader te bepalen tijdstip.

De curatrice mr. Doris M. Leitch-Canwood
J.G. Emanstraat no. 49-A
Tel: 582-1255 / 582-1241 Fax: 583-1910
stad, Aruba